



Aalajangiiffigisassatut siunnersuut, Naalackersuisut misissuinissamut suliakkerneqarnissaat, saqqummiutissallugu innuttaasut aningaasaataannut qanoq sunniuteqartigissanersoq suliaritittussat utaqqisarnerisa annikilliseriaqqinnissaanut suliniut. Misissuineq paasissutissiisaaq suut periarfissaanersut utaqqisut ikilisinnissaanut aammalu aningaasartuutissat suusanersut. Misissuineq siunnersuutinik imaqassaaq.

(Inatsisartunut ilaasortaq Justus Hansen, Demokraatit)
(Siullermeenera)

Demokraatini, immaqqa oqarsinnaavugut tupinnanngitsumik, nuannaarutigaarput Justus Hansenip siunnersuutaa manna oqallisigisinnaagatsigu.

Peqqissutsimut pilersaarut 2014-meersumi; tulleriinnut marlunnut avinneqarsimasumi, ilaatigut allaqqavoq peqqissutsimut sullisseriaaseqassasugut, innuttaasut misigitillugit kiffartuussineq qaffasissuusooq, tassani soorlu ilaatigut oqaatigineqartassalluni, qanoq sivilutigisumik utaqqisoqartassanersoq.

Tulleriinniliinerit marluk ukuupput; Peqqinnissaqarfiup pilersaarutaanut pilersaarut aamma maannakkut aningaasaliissutigineqartut iluanni ineriartortitsineq aamma pitsanngorsaatisatut kissaatigisanut pilersaarut politikkikkut pingaarnersiuinermut tamakkiisumut ilaatinneqartussaq kiisalu peqqinnissaqarfik innuttaasunut ilaqutariinnullu pitsaasunik sinaakkusiissasooq naatsorsuutigineqaaqqullugu peqqissutsip aalajangiusimaneqarsinnaanissaa aamma peqqinnissaqarfiup qularnaassagaa ataqatigiisumik sullissisoqarnissaa.

Uani siunnersuut isigaarput tamatumunnga ikiorsiisussatut aamma isigaarput Peqqissutsimut pilersaarummut tapersiutitut.

Nalunngilarput Peqqinnissaqarfiup aningaasaqarnera ullumikkut ilungersunartorsiorfiusooq aamma isumaqarpugut nunami maani kusanartumik taassuma iluani sullissisoqartoq.

Pitsanngorsaaniissamut inissaqarpoq, sualummik utaqqisut, napparsimasut oqarasuaataat il.il. eqqarsaatigalugit, kisianni aamma pisariaqarpoq immikkoortumi pingaarnersiuisoqarnissaa iluarsisoqarnissaalu, siunissami aningaasartuuteqarnerulersussaagatta - ilaatigut utoqqarnut katsorsarneqarnerusariaqalersussanut, peqqinnissaqarfimmi naliginnaasumik nutarterinissamut aamma nakorsaatinut akitsoraluttuinnartunut.

Tassani Demokraatini tikkuarusupparput, Nuna Avannarlerni Siunnersuisoqatigiit ulluni makkuna suliarimassuk siunissamut pilersaarut atasinnaasooq, Nunani Avannarlerni ataatsimoorluni nakorsaatisiniartalernissamut, taamaaliornikkut pisariaqanngitsumik akit



qaffattarnissaat pinaveersimatinniarlugu aamma taamaaliornikkut qularnaarumallugu nunat avannarliit - nunat baltikummiittut ilaat suleqatigalugit - siunissami ukiorpassuarnut annertuumik nakorsaatisiniartarnissaq akikinnerusunik.

Suleqatigiinneq assersuutissatsialaavoq Naalagaaffeqatigiinnerup qanoq iluaqutaasinnaaneranut aamma suut ataatsimoorfiit suleqataaffiginerigut Kalaallit Nunaannut iluaqusiisinnaasut aamma taamaattumik qularnaartariaqarparput suleqataaffiginissaat.

Isumaqarpugut manna siunnersuut isigneqassasoq tamakkiisumik takunninnissamut periarfissatut qanoq inuiaqatigiinnut akeqartarnersoq napparsimasortatta ikiorneqarsinnaaneq ajornerat sukkanerpaamik suleqqilernissaat pillugu.

Soqutiginarsinnaavoq tamakkiisumik paasissallugu qassit pilattartinnissaminnut utaqqisarnertik sivisuumik ajoqutissarsivigisarneraat aamma sivisuumik utaqqisariaqartarnerup kinguneranik qassit misigisarnersut pitsaaliuisoqarsinnaagaluartoq, takuniarlugu tamanna qanoq inuiaqatigiit aningaasarsiornerannut tamakkiisumik sunniuteqartarnersoq.

Aamma siunertamut naleqquttuusinnaavoq tamakkiisumik takussallugu kiffartuussinerit suut kalaallit napparsimasut atorsinnaaneraat, taamaattumik Justus Hansenip uani aamma siunnersuutigaa misissorneqassasoq kiffartuussilluarnikkut suut aningaasartuutit pinngitsoortinneqarsinnaanersut soorlu napparsimaviit namminersortut atornerisigut takuniarlugu inuiaqatigiit aningaasarsiorneranni qanoq annaasaqartoqartarnersoq napparsimasut ikiorniarlugit erngiinnaq pilattaasoqartannginnera pissutigalug.

Misissueqqissaarnissamut sakkut amingaataappat aamma inuiaqatigiit aningaasarsiornerannut naatsorsueriaatsit immikkoortumi amingaataappat, taamaattumik Demokraatini Naalakkersuisut kaammattorusuppagut pineqartuni assersuutit pillugit danskit peqqissutsimut ministeqarfiat oqaloqatigeqqullugu.

Naggataatigut oqaatigerusupparput ilisimagatsigut pilattaaviit allallu atortut nunatsinni napparsimavinni sumi tamaani pitsanngorsangaatsiagassaasut taamaattumik isumaqarpugut pitsaassasoq pilattaasartunut angalasartunut napparsimavinnut annernut takkuttartunut aningaasartuutit naleqqersuuttariaqartut taakku angalasartut napparsimavinnut minnernut ornigutsinnagit napparsimasut napparsimavinnut annernut atortorissaarnerusunullu assartorneqatalersuuppata aningaasartuutaajumaartussanut.

Ataatsimut isigalugu Demokraatini matumuuna ilalerparput siunnersuullu innersuullugu Ilaqutariinnermut Peqqissutsimullu Ataatsimiititaliamut.